

Lider di Fraccion di MEP Eddy Briesen

A dura Gobierno di MEP hopi aña prome cu a traha e parke di molina na Vader Piet

ORANJESTAD – E siman aki tin e caso den corte di e grupo cu a protesta contra di e molina di biento. Lider di Fraccion di MEP Eddy Briesen a repasa varios corant y wak con Gobierno a para tras di e proyecto aki. E comentario di Minister y Parlamentarionan den prensa, ningun di nan argumetonan ta valido den nan expresionnan con MEP a traha e proyecto di Vader Piet.

CONSTRUCCION

E argumento cu AVP ta uza ta cu den 9 dia a tuma e decision pa traha e proyecto di Vader Piet. Briesen a bisa cu ta desde aña 2004 e compania German Windpower Concorcium, cu ta un grupo Aleman cu mas di 60 aña di existencia, a acerca gobierno y WEB pa

bin cu un parke di molina. E idea tabata pa traha, maneha y despues traspasa e molinan pa WEB. E tempo ey tabata papia di un proyecto cu lo produci 60 megawatt.

Practicamente 60 porshento di e coriente cu Aruba ta produci nan kier a produci. A haci varios pregunta na WEB ria e aspectonan tecnico, pero na juni 2004 WEB a manda bisa nan cu WEB mes tin su molina di biento di 10 megawatt y cu WEB mes ta bay traha esaki.

INTERES

WEB e tempo ey no a mostra mucho interes den e proyecto. Director e tempo ey di WEB ingeniero Jossy Lacle a bisa cu mester wak e aspecto economico di WEB tambe. Si traha un parke

di 60 megawatt e tin consecuencia pa e inversionnan di WEB. Despues cu e grupo Aleman a bay, a bin e desaroyado nan di e proyecto di Vaderpiet cu un planta cu por produci 20 pa 30 megawatt, un proyecto mas realisabel pa WEB. Cu esaki Briesen kier ilustra cu na varios ocasion tabata tin gruponan tabata bin Aruba pa analisa e opcionnan. No ta asina cu den 9 dia a dicidi cu ta bay construi Vader Piet, esey ta algo ilogico pa e Lider di Fraccion di MEP den Parlamento.

EXPERIMENTO

Fraccion di AVP a bisa cu e molina di biento na Vader Piet ta un experimento y cu na ningun momento a papia cu e habitantenan di e barrio. Den un anuncio den medionan di comunicacion cu

a sali na aña 2004 a haci un yamada na e comunidad di San Nicolas pa papia riba e proyecto.

E tempo ey tabata na YMCA cu a organisa un anochi informativo di 7 pa 9 or. Durante e encuentro aki a presenta e MER rapport riba e proyecto di Vader Piet, caminda cu tur hende por a wak e informacion di e impacto di e proyecto di molina di biento na Vaderpiet. Briesen ta kere cu AVP kier uza e habitantenan di San Nicolas contra di partido MEP. E ta haya e posicion di AVP hopi zwak y sin ningun argumento. E parlamentario di MEP a indica cu fraccion di AVP ta trece puntonan dilanti cu no ta cuadra cu realidad di e proyecto di Vaderpiet. □